

आकाशवाणी जयपुर-अजमेर

प्रादेशिक समाचार

दिनांक 20.05.2025

समय: 18.48 बजे

- प्रधानमंत्री नरेन्द्र मोदी 22 मई ने बीकानेर ऊं 26 हजार करोड़ रुपया ऊं बत्ता खर्च री विकास री केई परियोजनावां देश ने संपेलां
- प्रधानमंत्री विश्व स्वास्थ्य संगठन रा सत्र ने वर्चुअल तरीका ऊं सम्बोधित कीना-सगळां ऊं स्वस्थ जीवन सारू योग ने अपनावण सारू कह्यो
- राज्यपाल हरिभाऊ बागडे विश्वविद्यालयां रा दीक्षांत समारोह हर साल राखण बाबत् कह्यो
- बीकानेर, जयपुर अर भरतपुर संभाग मांय ज़बरदस्त गर्मी अर लू- आवता दो दिन मांय पारो और चढ़बा रा आसारं

000

प्रधानमंत्री नरेन्द्र मोदी ई गुरुवार ने बीकानेर ऊं 26 हजार करोड़ रुपया ऊं बत्ता खर्च वाळी विकास री केई परियोजनावां देश ने संपेलां अ रेलवे, सड़क, बिजली, पाणी अर नवीकरणीय ऊर्जा सरीखा हलकां मांय खास काम करेलां

000

प्रधानमंत्री नरेन्द्र मोदी रो 22 मई ने बीकानेर जिला रा देशनोक ऊं देशभर रा 103 ओजू विकसित करी ज्या रेलवे टेशनां रो वर्चुअल तरीकां ऊं उद्घाटन करण रो कार्यक्रम हैं अमृत भारत स्टेशन योजना रा तैत विकसित आं टेशनां मांय राजस्थान रा ई आठ टेशन देशनोक, बूंदी, मांडलगढ़, गोविंदगढ़, गोगामेड़ी, मंडावर-महुआ रोड़, फतेहपुर शेखावाटी और राजगढ़ भेळा हैं 75 करोड़ रुपया खर्च कर र और बेहतर बणायी ज्या आं टेशनां मांय सुबीता, सुंदरता अर संस्कृति रो तालमेर निजर आवे हैं म्हाणी हनुमानगढ़ खबरनवीस बतायो के गोगामेड़ी टेशन री काया पलट करण रा काम माथे करीब 14 करोड़ रुपया खर्च करी ज्या हैं

चूरू जिला रा राजगढ़ टेशन ने ई करीब 17 करोड़ रुपया रा खर्च ऊं नुवो बणायी ज्यो हैं म्हाणा खबरनवीस बतायो के नुवा सुबीतां वाळा जगमग टेशन ने देख र मुसाफिरां मांय ई उमाव हैं

000

प्रधानमंत्री नरेन्द्र मोदी कह्यो है के भारत रा स्वास्थ्य सुधारां री जड़ समावेशिता है कां कि सरकार पूरा देश मांय मोटी तादाद मांय स्वास्थ्य अर कल्याण केंद्रां रो मोटो नेटवर्क खड़ो कीनो हैं श्री मोदी कह्यो के भारत मांय चलायी जा रही दुनिया री सब ऊं मोटी आयुष्मान भारत स्वास्थ्य बीमा योजना रे जरिये 5 लाख 80 लाख मरीजां रो मुफ्त इलाज करायो जा रह्यो हैं स्विट्ज़रलैण्ड रा जिनेवा मांय विश्व स्वास्थ्य संगठन रा 78वां सत्र ने वर्चुअल तरीका ऊं संबोधित करता थकां श्री मोदी कह्यो के स्वस्थ दुनिया रो भविष्य समावेशिता, एकीकृत नज़रिया अर आपसी मदद माथे निर्भर करे हैं प्रधानमंत्री मोदी स्वस्थ जिन्दगी सारू सगळा ऊं योग ने रोजीना री जिन्दगी मांय शामिल करण बाबत् कह्यो हैं

विश्व स्वास्थ्य संगठन री महासभा भारत ने ट्रेकोमा ने जड़ ऊं खत्म करण सारू ईनाम दे र नवाजो हैं भारत लंकाऊ-ऊगणी एशिया हलका मांय आ उपलब्धि हासिल करण वाळा तीजो देश बण ग्यो हैं सरकार ट्रेकोमा ने जड़ ऊं खत्म करण सारू राष्ट्रीय अंधत्व नियंत्रण कार्यक्रम रा तैत कई जतन कीना हैं

000

राज्यपाल हरिभाऊ बागडे कह्यो है के विश्वविद्यालय मांय ज्यीं साल विद्यार्थी री शिक्षा पूरी व्हे जावे, वां ई साल दीक्षांत समारोह राख्यो जावणो चाहिजें राज्यपाल आज जयपुर मांय राजस्थान स्वास्थ्य विज्ञान विश्वविद्यालय-आरयूएचएस रा 10वां दीक्षांत समारोह मांय बोल रह्या हां वे कह्यो के समाज ने चोखा अर होशियार डॉक्टर मुहैया करावण सारू चिकित्सा शिक्षा मांय मौलिक शोध अर अनुसन्धान माथे ज़ोर दियो जावणो चाहिजें राज्यपाल कह्यो के विद्यार्थियां ने डिग्री ई टेमसर देवण सारू सगळा लेवल माथे कोशिशों करी जावणी चाहिजें श्री बागडे कह्यो के विद्यार्थियां रो दिमागी बूतो बधावण माथे ई खास ध्यान दियो जावणो चाहिजें ई मौके राज्यपाल "नेशनल एकेडमिक डिपोजिटरी पोर्टल" री ई सरूआत कीनीं इण रे जरिये आरयूएचएस रा भणार्ई-लिखाई ऊं जुड़्या रिकॉर्ड ने डिजिटल बणायो जावेलां

000

ऑपरेशन सिंदूर री कामयाबी अर सशस्त्र बलां ने नमन करण सारू प्रदेश मांय न्यारी-न्यारी ठोड़ां तिरंगा यात्रावां निकाळी जा रही हैं सवाईमाधोपुर जिला री खंडार तहसील मांय निकाळी ज्यी तिरंगा यात्रा माथे न्यारी-न्यारी ठोड़ां फूलां री बरसात करी ज्यीं पाली मांय ई फौजियां रा मान मांय महिलावां री ओर ऊं सिंदूर यात्रा कार्यक्रम राख्यी ज्यो जवानां री हिम्मत ने नमन करता थकां भरतपुर मांय खून दान शिविर लगायी ज्यो, जिण मांय वीरांगनावां ई सिरकत कीनीं जयपुर मांय आज महिलावां री ओर ऊं सिंदूर यात्रा निकाळी जा रही हैं इण मांय मुख्यमंत्री भजन लाल शर्मा, उपमुख्यमंत्री दीया कुमारी अर जयपुर री सांसद मंजू शर्मा समेत मोटी तादाद मांय महिलावां सिरकत कीनीं ई मौके श्री शर्मा कह्यो के ऑपरेशन सिंदूर रे जरिये भारत री फौज री दक्षता पूरी दुनिया देखी हैं

000

बीकानेर, जयपुर अर भरतपुर संभाग रा कुछ हलकां मांय आज ई लू रो असर रह्यो पाली, हनुमानगढ़, श्रीगंगानगर, चूरू, जैसलमेर अर बारां समेत न्यारी-न्यारी ठोड़ां पड़ रही ज़ोरदार गर्मी ऊं हाल बेहाल रह्यां सवाईमाधोपुर मांय ई ज़ोरदार तावड़ो पड़ रह्यो हैं दिन ऊग्यां ई पड़ रह्या ज़ोरदार तावड़ा ऊं घणी परेशानी व्हे रही हैं प्रशासन री ओर ऊं लू अर तावड़ा रा असर ऊं बचाव सारू एडवाइजरी जारी करी ज्यी हैं पाली रा सीएमएचओ विकास मारवाल दिन री बगत ज़रूरी व्हेवण परां ही बाहर जावण अर पीवण री चीजां काम लेता रेहवण री अपील कीनीं हैं मौसम विभाग रे मुजब काल ऊं 23 मई ताई बीकानेर, जोधपुर, जयपुर अर भरतपुर संभाग मांय कठे-कठे पारो 45 ऊं 47 डिग्री सेल्सियस बीचे रेहवण री संभावना हैं ई सागे ई रात री बगत ई तापमान ऊं रेहवण रा आसार हैं ई दौरान सरहदी हलकां मांय धूळो उड़बा सागे ज़ोरदार बायरो बाजण री संभावना हैं मौसम केन्द्र जयपुर रा निदेशक राधेश्याम शर्मा बतायो के आवता दो दिन मांय केई ठोड़ां पारो 1 ऊं 2 डिग्री सेल्सियस ताई चढ़बा रा आसार हैं

000

21 जून ने मनाया जावण वाळा अंतर्राष्ट्रीय योग दिवस री ज़ोरदार तैयारियां करी जा रही हैं बाड़मेर मांय आज योगाभ्यास री सरूआत करी ज्यीं आयुर्वेद विभाग रा सहायक निदेशक डॉक्टर प्रदीप धन्दे बतायो के योग दिवस रा काउंट डाउन कार्यक्रम रा तैत लोगां मांय जाग जगावण सारू अस्पतालां, आयुष्मान आरोग्य मंदिरां अर औषधालयां मांय योगाभ्यास रा कार्यक्रम चलायी ज्यो हैं

000